



Jens Kristian Therkelsen
Inatsisartunut ilaasortaq
Siumut
inatsisartut@ina.alla.gl

Timmisartuussinermi kinguaattoornerit pillugit § 37 naapertorlugu apeqquaqammumut 2024-059-imut akissut

15-04-2024
Suliap normua: 2024-6395
ID. nr. 91781408

Asasara Jens Kristian

Inatsisartut suleriaasianni § 37 naapertorlugu timmisartuussinermi kinguaattoornerit pillugit Naalakkersuisunut apeqquaqateqarputit. Apeqquqtitit uannit akineqartussatut innersuunneqarput. Apeqquqtitit matuma kinguliani ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

1. Air Greenland A/S ilaaffigalugu angalagaanni kinguaattoornermi, qanoq ilinikkut aningaasannorlugu taarsiiffigitissinnaaneq atuutsilertarpa?

Akissut: Angalasunut EU-mi angalanerminnik aallartittunut EU-mi peqqussut 261 atuuppoq, tassaallunilu silamik patsiseqanngitsumik kinguaattoornernut, taamaatitsinernullu atuuttoq.

Kalaallit Nunaat EU-mut ilaasortaangimmat, angalasunut Kalaallit Nunaanni angalanerminnik aallartitsisunut EU-mi peqqussut 261 atuutinngilaq. Angalasut Kalaallit Nunaanni angalanerminnik aallartitsisut taamaatitsinerni, akunnerillu tallimat sinnerlugit kinguaattoortoqartillugu angalanissaminnik allanngortitsinissaminnut pisinnaatitaaffeqarput imaluunniit inniminniinermi akia utertissinnaatitaavaat, taamaalillunilu angalanissartik taamaatitillugu. Taassumap saniatigut Air Greenlandimi angalasut pisinnaatitaaffiini ima allassimavoq:

"Timmisartornemik taamaatitsinerup kingunerisaanik kinguaattooruit Air Greenland ilinnut (upernarsaatissalimmik) ajoqusiinermut taarsiissuteqassaaq. Tamannali Air Greenland ajoqusiinnaanerup pinnginnissaa anguniarlugu sutigut tamatigut iliuuseqarsimappat atuutinngilaq, imaluunniit pisup pinngitsoortinnissaanut iliornissamut periarfissaqarsimanngippat."

(Aallerfik: Air Greenlandip quppersagaa [Pisinnaatitaaffitit](#))

2. Nunaqarfinniit nunaqarfinnut angalagaanni kinguaattoornerlu pissutigalugu utimut aallanngitsooraanni, illoqarfinnut angalaneq assigalugu unnuiffissaq nerisaqarnerlu Air Greenland A/S-mit isumagineqartarpa?

Akissut: Kinguaattoornerit patsisaallutik angalasut uterlutik angalasinnaangippata, tak. kiffartuussinissamik isumaqatigiissut attuuttoq, angalasut nerisaqarnermut kiisalu pisariaqartillugu unnuinermut aningaasartuutaat matussusissallugit Air Greenland

akisussaavoq. Tamanna ingerlatsisup niuerneramik tunngaveqarluni angallaviini kiisalu kiffartuussinissamik isumaqatigiissutip iluani angallavinni atuuppoq. Taamaattumik siulianiittoq illoqarfiit, nunaqarfiillu akornanni angalanerni atuuppoq.

3. Nunani allani kinguaattoortoqartillugu nalunaaquttap akunneri arlallit qaangiukkaangata taarsiiffigitissinnaaneq piulersarpoq. Tamanna nunatsinni sooq atuutsingila?

Akissut: Apeqqut 1-ip akinerani nassuiaatigineqartut EU-mi inatsit pineqarpoq, taamaattumillu tamanna Kalaallit Nunaanni atuutigani.

4. Teknikimik pissuteqartumik Uummannami Upernavimmilu angallassinngitsoortarnerit 2023-mi qanoq amerlatigaat?

Akissut: Air Greenlandip paasisutissiissutigaa, teknikimik patsiseqartumik Uummannami, Upernavimmilu 2023-mi taamaatitsineq tamarmiusut 394-iusimasut, aallarnerillu katillugit 2947-simasut.


5. Immikkut qulimiguulimmik sillimmataasussamik Uummannami Upernavimmilu inissiinissaq pilersaarutigineqarpa?

Akissut: Qulimiguulik H155 Uummannami aallaaveqarsimasoq immikkut illuinnartumik teknikikkut ajornartorsiuteqaqattaarsimavoq. Tamanna pillugu qulimiguulik teknikerinut, kingoraartissanullu qaninnerutinniarlugu Ilulissanut nuunniallugu Air Greenland aalajangerpoq. Taarsiullugu qulimiguulik H155-i alla Air Greenlandip Uummannamut inissippaa. Air Greenlandip naatsorsuutigaa, Uummannamut nunaqarfinnullu aalaakkaanerusumik timmisartuussisarnermik tamanna kinguneqassasoq.

Tassunga tunngatillugu Qeqertarsuup Tunuani, Uummannami imaluunniit Upernavimmi ukiuunerani kingoraartissatut atugassaminnik Air Greenland nammineq kajumissutsiminik qulimiguulimmik H155-imik pissarseqqippoq. Taamaalilluni qulimiguulik kiffartuussinissamik isumaqatigiissummut ilaanngitsoq Ilulissaniippoq.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga



Hans Peter Poulsen